



Pamantalaan sa Rebolusyonaryong Kalihukan - Sentral Bisayas

PAKIGBISOG

Bolyum XVI Ihap 1

Hulyo - Agosto 2000

Editoryal

Human sa pasistang pagpang-atake niadtong Hulyo 2...

Lig-on nga Atubangon ang Bag-ong Hugna sa Rebolusyonaryong Pagsukol!



(gikan Ang Bayan)

Ang reyd nga gilunsad sa Philippine Army 801st Brigade niadtong Hulyo 2 sa taktikal nga kampo sa NPA didto sa sitio Diis, Brgy. Kauswagan, Trinidad, Bohol nagpakita sa bag-ong pagliko na usab sa nagkakusog nga kontrarebolusyonaryong opensiba sa pahoy nga rehimeng Estrada batok sa rebolusyonaryong katawhan. Bisan pa man sa pagka-superyor sa tropa sa kaaway ug pag-angkon nila og mas bentaha nga posisyon sa tereyn, ang mga kadre sa Partido ug Pulang manggugubat mabayanihong nakig-away batok sa atake sa kaaway aron pakyason ang laraw sa pasistang tropa sa malupigong hut-ong nga puohon ang tibuok nga rebolusyonaryong pwersa sulod sa maong kampo. Gibandila sa mga kauban ang dili mabuntog nga diwa sa tinuod nga kasundalohan sa katawhan – hingpit nga kayugot ngadto sa mersenaryong tropa sa hut-ong malupigon, ug tumang kaisog sa pag-atubang sa tanang sakripisyo, lakip na ang kamatayon, tungod ug alang sa masang linupigan.

Ang Partido, Bag-ong Kasundalohan sa Katawhan, ug rebolusyonaryong masa, labing nagbangutan sa pagkamatay sa walo ka mga rebolusyonaryong martir didto sa Brgy. Kauswagan. Ang pagbuhis nila sa ilang kinabuhi subling nagpamatuod nga ang dalan sa rebolusyonaryong pakigbisog puno sa mga kalisdanan, pag-antus, ug paghalad sa kinabuhi una pa makab-ot sa katawhan ang nasudnon ug katilingbanong kalingkawasan gikan sa nagtunhay nga langyaw ug pyudal nga pagpanglupig.

Ang reyd niadtong Hulyo 2 sa Brgy. Kauswagan maoy sinyas sa pagsugod sa lain na usab nga hugna sa linuog nga kontra-rebolusyonaryong kampanya sa pasistang rehimeng US-Estrada dinhi sa Tunga-tungang Kabisay-an. Ang kondukta sa mga tropa sa Philippine Army 801st Brigade, diin lakip nga gipatay niini ang mga dili kombatant kon sibilyan, ug mga “*hors d combat*” (kanhi kombatant nga wala na’y katakus sa armadong pagsukol tungod sa samad ug uban pa), tataw nga kalapasan sa mga internasyonal nga

lagda sa gubat sama sa Geneva Conventions of 1949 ug Protocols I and II of 1977. Kinahanglang sabton sa tibuok nga rebolusyonaryong pwersa kining maong bag-o ug mas taas nga ang-ang sa kontra-rebolusyonaryong gubat pinaagi sa dugang pang pagpalig-on sa pagsagop sa teorya ug praktika sa malanatong gubat sa katawhan

Bisan nagpabiling bug-at nga suliran ug nanguna sa prayoridad sa pahoy nga rehimeng Estrada ang pakiggubat batok sa Moro Islamic Liberation Front – Bangsamoro Islamic Armed Forces (MILF-BIAF), giseguro gihapon sa nagharing hut-ong nga mabutangan og igo-igong tropa sa AFP/PNP ang rehiyon subay sa iskemang Oplan Makabayan-National Peace and Development Plan-Oplan Balanghai. Ubos ▶

sa sulod...

1

Editoryal

3

“Emergency powers” ni Erap

6

Marvin Marquez

8

PKP midayeg sa MILF

ining mga kontra-rebolusyonaryong iskema, giila sa rehimeng US-Estrada ang kamahinungdanon sa Cebu isip ikaduhang sentrong syudad sa nasud, ug gipunting ang Bohol isip usa sa tulo ka laboratoryo sa tibuok Pilipinas alang sa kontra-katawhang lokal nga panagsabot-sabot alang sa kalinaw.

Apan wala kini nagpasabot nga nakaabante na sa unahan ang kampanyang pagsumpo batok sa rebolusyonaryong pakigbisog sa katawhan. Gani, kining mga laraw nagpakita lamang sa grabeng pagkadesperado sa nagharing hut-ong nga masumpo ang inang-ang-ang-ang nga pag-abante sa rebolusyonaryong armadong pakigbisog ug sa mga kapakyasan niini sa tanang nangaging kampanyang pagpanumpo. Sa kinatibuk-an, tataw nga timaan kini sa nagkagrabeng krisis sa nagmandong sistema.

Ang reaksyunaryong pwersa anaa gihapon sa estratehikong opensiba o superyor nga pusisyon, samtang ang pwersa sa rebolusyon nagpabiling anaa sa estratehikong depensiba. Gawas sa padayon nilang kampanya sa pagliyok ug pagsumpo sa rebolusyonaryong pwersa, ang gikaatubang natong kaaway mas lig-on ug superyor niining yugto sa gubat sa katawhan. Apan pinaagi sa pagsubay sa dalan sa malanatong gubat sa katawhan ug sa pagpaduso sa kuyanap ug sunson nga gerilyang pakiggubat nga nanukad sa nagkalapad ug nagkalawom nga baseng masa, padayong milig-on ang Pulang kasundalohan diha sa paglunsad og armadong pakigbisog, tinuod nga reporma sa yuta ug pagtukod og baseng masa. Sa ingon, binalud-balud nga gipundar ang demokratikong kagamhanan sa katawhan subay sa linyang liyokan ang kasyudaran gikan sa kabanikanhan hangtud nga masakmit ang politikanhong gahum sa nasudnong ang-ang.

Ilawom sa giya sa Ikaduhang Malangkubong Kalihukang Pagtul-id nga gilunsad sukad niadtong 1992, ang Partido, Pulang kasundalohan ug tibuok rebolusyonaryong katawhan nagpabilin ug padayong nagtigom og rebolusyonaryong kusog taliwala sa walay-undang mga kontra-rebolusyonaryong kampanya sa kaaway. Gani, sunod-sunod nga napakyas ang mga kampanya sa pagliyok ug pagpanumpo sa mersenaryong tropa sa PNP/AFP batok sa armadong rebolusyon sa rehiyon.

PAKIGBISOG

PANAWAGAN

Ang Editoryal Istop sa **PAKIGBISOG** nag-awhag sa mga mambabasa nga motampo sa pagpalambo sa atong pamantalaan pinaagi sa paghatag og mga komentaryo ug sugyot, mga balita o mga rebolusyonaryong kasinatian nga mahimong imantala sa atong pamantalaan.

Gibandila sa mga kauban ang dili mabuntog nga diwa sa tinuod nga kasundalohan sa katawhan – hingpit nga kayugot ngadto sa mersenaryong tropa sa hut-ong malupigon, ug tumang kaisog sa pag-atubang sa tanang sakripisyo, lakip na ang kamatayon, tungod ug alang sa masang linupigan.

Human giila sa kaaway ang “subling pagkusog sa rebolusyonaryong kalihokan” niadtong Marso 1996, milunsad ang PNP Provincial Command ug PNP 702nd Provincial Mobile Group (PMG) sa Oplan Bionic/Bulawan gikan Agosto 1996 hangtod Hunyo 1998 ilawom ni P/Col. Laurence Cadungog ug P/Capt. Ruel Lagala. Human sa malampusong reyd sa Pulang kasundalohan sa Balay-lungsod sa Batuan niadtong Hunyo 1998, gitukod ang Bohol Island Task Force (BITF) nga gipangulohan ni P/Col. Alex Castro (PNP) ug gilangkoban sa PNP Provincial Mobile Group (PMG) ug PNP Regional Mobile Group (RMG).

Apan malampuson nga gireyd sa NPA Chocolate Hills Command niadtong Hunyo 11, 1999 ang hedkwarter sa 7th PNP Regional Mobile Group Combat Support Company (RMG-CSC) sa Brgy. Rizal, Batuan ug nailog ang 60 ka tag-as nga kalibreng armas, lakip ang usa ka 60 mm mortar ug usa ka M-60 machine gun. Tungod niini, hinanaling mipa-deploy ang kaaway og gatusan ka mersenaryong tropa sa Bohol nga gikan sa Philippine Army (Scout Rangers, Reconnaissance Company, Special Forces) ug PNP (Special Action Forces). Niadtong Septiembre 1999, gitukod ang Task Group Bohol (TGB) ubos ni Col. Gilbert Cayton nga naglangkob sa gatosan ka mersenaryong tropa gikan sa Philippine Army 12th Infantry Battalion (IB), Special Forces (SF) ug Engineering Battalion nga gisuportahan sa gatusan usab ka mga tropa sa PNP RMG, PMG ug CAFGU. Ug niining miaging Hunyo 2000, gipulihan sa Philippine Army 801st Brigade ang pakyas nga Philippine Army 12th Infantry Battalion.

Sa laktod, wala gayud milampos ang sunod-sunod nga mga kontra-rebolusyonaryong kampanya sa nagharing hut-ong batok sa Partido, Pulang kasundalohan ug demokratikong kagamhanan sa katawhan. Tataw napakita sa praktika nga mahimo gihapong pakyason ang kasamtangang kontra-rebolusyonaryong kampanya sa pagliyok ug pagpanumpo nga gipangulohan sa Philippine Army 801st Brigade kun padayon kitang mohupot sa tukmang gerilyang taktika nga adunay pleksibilidad ug inisyatiba, ug mopasibo sa nagtunhayng kahimtang sa gubat.

Matud pa sa Pamahayag sa Komiteng Rehiyonal sa Partido niadtong Marso 29, 2000 nga giulohan og “*Ipataas Pa ang Rebolusyonaryong Kaisog sa Pagpasulong sa Gubat sa Katawhan Atubangan sa Grabeng Krisis*” :

“Ang mga kadaugan sa Pulang kasundalohan ug rebolusyonaryong katawhan sa Sentral Bisayas bunga sa pagpatuman sa isipisikong linya sa kuyanap ug sunson nga gerilyang pakiggubat nga nanukad sa nagkalapad ug nagkalawom nga baseng masa subay sa heneral nga pulitikanhong linya sa nasudnon-demokratikong rebolusyon pinaagi sa malanatong gubat sa katawhan. Ang maong isipisikong linya sa gerilyang pakiggubat nagtugot nga ipatuman ang istraktura sa pwersa sa Pulang kasundalohan ▶



“Emergency Power” ni Estrada Makapadali sa Pagkahugno sa Kaugalingong Rehimen

Pamahayag ni Gregorio “Ka. Roger” Rosal

Tigpamaba, Partido Komunista sa Pilipinas

24 Hulyo 2000

(Pahibalo: Ang Pakigbisog subling niimprenta sa pamahayag nga giluwatan sa Partido Komunista sa Pilipinas pinaagi sa tigpamaba niining si Gregorio “Ka. Roger” Rosal mahitungod sa tinguha ni Estrada nga makabaton og “emergency powers.”)

Ang “State of the Nation Address” ni Estrada niadtong Hulyo 24 nagduon lakip na sa uban pang mga hisgutanan, sa nangunang balaod mahitungod sa emergency powers nga matud pa, makapaspas sa pagpahiuli sa Mindanao. Apan ang maong balaod nagbaton sa labing taas nga probisyon sa paghatag kang Estrada og lapad nga gahum alang sa pagmonopolyo sa ekonomiya ug pagpangdaug-daog ubos sa pulitika. Ang labing mapintas niini mao ang iyang katungod sa pagpahamtang og mga moratorium o pagpakgang sa paglunsad og mga welga, pagsuspenso sa pagpasar og mga Temporary Restraining Orders (TROs) batok sa mga proyekto sa gobyerno nga nakapapahawa sa kapul-an ka libo nga mga Moro, Lumad ug Kristyano, pagdeklarar sa mga tax holidays (dili pagpabayad sa mga dagkong negosyante ug langyaw’ng korporasyon og buhis), ug ang pagdeklarar sa mga economic zones nga nagsuspenso sa unsa pa may nahabiling pagpakaaron-ingnon sa programa sa gobyerno sa repormang sa yuta. Gani, wala pa makuntento sa Mindanao, ang mga kakunsaba ni Estrada sulod sa kongreso nagpaduso sa nasudnong kalangkuban sa emergency powers.

Ang rehimeng US-Estrada tataw nga nagkabuang aron dugang pang mapalapdan ug mapaspasan ang pagpanghimulos sa langyaw’ng monopolyo sa tibuuk Mindanao. Dako usab ang kagastuhan niiningmakuha ang iyang bahin gikan sa \$1 bilyon nga pantang gikan sa Official Development Assistance [ODA] -- mga editor)

Aron kunohay mapadali ang “rehabilitasyon” o pagpahiuli sa ekonomiya sa Mindanao, mipaduso si Estrada sa reaksyunaryong kongreso nga hatagan siya og “emergency powers.” Apan sa tinuud, mapadali lang ni Estrada ang kaugalingong pagkahugno niini sa gahum.

Desperado na kaayo si Estrada atubangan sa nagkadaghan ug makanunayong nga mga taktikal nga opensiba sa Bag-ong Kasundalohan sa Katawhan o NPA, nagkakusog nga mga protestang anti-Estrada, ug human mapakyas pagpulpog sa armadong pakigbisog sa Moro Islamic Liberation Front-Bangsamoro Islamic Armed Forces. Buot ni Estrada sa pagkakaron nga ikonsentra sa iyang kamot ang pulitikanhong gahum susama sa usa ka pasistang diktador.

Tinguha ni Estrada nga mapasayon ang hingpit nga pag-abli sa ekonomiya ngadto sa langyaw’ng monopolyo subay sa dikta sa IMF-WB-WTO, hingpit nga pagpabalik sa gahum sa pamilya ug mga kaanib sa mga Marcos, ug hatagan og walay kinutubang pabor sa pulitika ug ekonomiya silang Lucio Tan, Danding Cojuangco ug ang uban pang dili matarong nga mga kroni niini, ug sumpoon ang mga pagpakigbatok labina sa mga mamumuo ug mag-uuma.

Walay ikahatag nga kaayuhan ngadto sa katawhan ang maong mga dili-makinasudnon ug kontra-demokratikanhong palisiya. Labaw pa kining mopagrabe sa daan nang grabeng pangdaug-daog ug kalisud nga gisinati nila ubos sa rehimeng US-Estrada.

Ang paghatag og “emergency powers” kang Estrada labaw lang nga mopalig-on ug mopalapad sa kontra-Estradang panaghiusa ug mopalig-on sa mga pwersang mopahugno sa iyang rehimen.

Walay hunong nga batukan sa Partido ug sa tanang rebolusyonaryong pwersa ang mga “emergency powers” ni Estrada.

Tin-aw sa tanang yunit ug manggugubat sa Bag-ong Kasundalohan sa Katawhan ang tahas nga maglunsad og mga ispesyal ug regular nga taktikal nga opensiba. Padayon kining maghatag dili lamang mga kusog nga sumbag sa ulo, kundili hasta usab ang pagpahamtang og daghang samad sa kalawasan sa rehimeng Estrada.

Ug bisan pila pa man ka “emergency power” ang iyang maangkon, dili na maluwas ni Estrada ang kahugnoon niyang gobyerno.

(sgd.) Gregorio “Ka. Roger” Rosal

◄ nga kanunay adunay nakaandam nga inisyatiba ug pleksibilidad atubangan sa kusgan nga kaaway. Kung wala ang giingong ispisipikong linya sa gerilyang pakigubat, dili mapreserba ang mga kadaugan sa Pulang kasundalohan sa rehiyon (Cebu ug Bohol) nga naglihok sa prenteng gerilya diha sa gagmay nga isla-isla, nipis ug hagip-ot nga kayutaan, ug diin makaplagan dinhi ang ikaduhang sentrong urban sa nasud.”

“Taliwala sa nagkadaghang tropa sa kaaway sa rehiyon

nahimong nilakanglakang nga nakapadaghan ug nakapakusog ang Pulang kasundalohan sa miaging tulo ka tuig hangtud nga nahimong pabilo ang armadong pakigbisog sa ubang matang sa rebolusyonaryong pagsukol sa katawhan ubos sa hut-onganong pagpangulo sa mamumuo pinaagi sa Partido. Busa, nahimong mas nidaghan pa ang mga alyado ug higala sa rebolusyon. Butang nga dugang nakapalig-on sa batakang alyansa ug batakang pwersa. Kanunay nga anaa sa kahimtang ►

◀ nga nagbangi ang han-ay sa nagmandong hut-ong. Kining tanan epektibong nakahaling sa “siak” na daan nga han-ay sa nagmandong hut-ong, ug nagpabiling nipis ang target sa rebolusyon sa usa ka takdang panahon. Ang (pagkasiak-siak) sa nagmandong hut-ong usa sa sangkap nganong makatunhay ang Pulang kasundalohan ug Pulang pulitikanhong gahum sa kabukiran.”

Pagpataas sa Kaakohan sa Pag-atubang sa Kusog nga Opensiba sa Kaaway

Aug ngay balik-tan-awon sa Partido, Pulang kasundalohan kasinatian sa pagpakyas sa Task Group Bohol (TGB). Ang malampusong komando-reyd sa Pulang kasundalohan niadtong Hunyo 1999 batok sa hedkwarter sa 7th PNP-RMG-CSC didto sa Brgy. Rizal, Batuan dakong hapak sa pasistang rehimeng US-Estrada. Gani, giila ang maong reyd isip labing dakong malampusong taktikal nga opensiba sa tibuok nasud sukad sa paglunsad sa Ikaduhang Malangkubong Kalihukang Pagtul-id niadtong 1992. Isip paningkamot nga makabawi sa inisyatiba sa gubat, nagpatuman ang pasistang AFP/PNP og mas bangis nga kontra-rebolusyonaryong kampanya sa pagsumpo batok sa rebolusyonaryong pwersa sa rehiyon.

Sukad Hunyo 1999, gisugdan sa mersenaryong AFP/PNP ang mga koordinadong operasyong militar nga gikumbinahan sa mga pag-psywar sulod sa gambalay sa Oplan Makabayan sa nasudnong ang-ang. Gikan sa ikaduhang semana sa Agosto hangtod unang semana sa Disyembre 1999, adunay relatibong kalampusan ang kontra-rebolusyonaryong kampanya sa kaaway sa paglunsad og ginagmay ug dinagkong pagpang-atake sa mga yunit sa Pulang kasundalohan sa lainlaing prente ug sonang gerilya. Gumikan kini sa pagtunhay sa giingong “pwersa sa nasandan” sulod sa han-ay sa pipila ka yunit sa hukbo nga wala pa makasagop sa bag-ong kalamboan sa kahimtang sa gubat. Sulod ning panahona, nakasinati ang Pulang kasundalohan og pito ka dependibong aksyon diin tulo ang nakalas nga mga kaubang-martir ug 18 ka tag-as nga kalibreng armas ang nailog sa kaaway. Sukad usab sa Septembre 1999, gigamit sa rehimeng US-Estrada ang traydor nga surrenderee nga si Jaime Decasa aron mopakuyanap og itom nga propaganda sa tinguhang mugnaon ang opinyong batok sa rebolusyonaryong kalihukan.

Niadtong Oktubre 1999, gipagawas ang dokumentong “*Dugang Pakusgon ang Rebolusyonaryong Kalihukan sa Tunga-tungang Kabisay-an Pinaagi sa Linya sa Kuyanap ug Sunson nga Gerilyang Pakiggubat!*.” Gisundan kini sa tigum sa Komiteng Tigpatuman sa Komiteng Rehiyon (KT-KR) niadtong Enero 2000 diin gidun-an ang horisontal nga pagpalig-on sa mga yunit sa Pulang kasundalohan aron makaangkon og dugang erya atubangan sa kusganong kampanya sa kaaway. Pinaagi sa mas malamboong paggamit sa gerilyang taktika sa pagkonsentra, pagbulagbulag ug

pagbalhin alang sa taktikal nga opensiba ug buluhatong masa, subling nasakmit sa Pulang kasundalohan ang inisyatiba ug kagawasan sa paglihok alang sa padayong pagpalambo sa tulo ka integral nga aspeto sa malanatong gubat sa katawhan – paglunsad og armadong pakigbisog, pagpatuman sa tinuod nga reporma sa yuta ug pagtukod og baseng masa.

Ang tukmang linya subling gitino sa dihang gilunsad sa lain-laing kumand sa NPA sa tibuok rehiyon ang sunod-sunod nga malampusong taktikal nga opensiba batok sa labing kontra-katawhang mga yunit sa mersenaryong AFP/PNP. Una niini ang mapangahasong reyd sa NPA Francisco Dagohoy Command didto sa hedkwarter sa PNP 702nd PMG sa Brgy. Sta. Fe, Danao, Bohol niadtong Disyembre 14, 1999. Gisundan kini sa makabungog nga ambus-dekoy sa NPA Chocolate Hills Command batok sa mga abusadong elemento sa Philippine Army 7th Special Forces ug CAFGU didto sa Brgy. Sta. Catalina, Sagbayan, Bohol niadtong Marso 2, 2000. Ug niadtong Abril 27, 2000, nakurat ang nagharing hut-ong sa dihang gidis-armahan sa NPA Vicente Padayao Command ang mga kapulisan sa Balay-lungsod sa banggiitang Mayor Thadeus Durano sa Sogod, Cebu. Gawas niini, tulo ka ispesyal nga taktikal nga opensiba ang malampusong gilunsad sa Arnulfo Mendez Command ug sa Francisco Dagohoy Command sa NPA gikan Abril hangtud Hunyo 2000 isip silot sa mga burukrata ug negosyanteng wala mipatuman sa mga rebolusyonaryong pamalaud sa demokratikong kagamhanan sa katawhan. Aduna usab pipila ka mga operasyong isparo nga gilunsad aron silotan ang labing lunod-patay nga mga sakop sa PNP ug mga kontra-katawhang elemento sa Bohol.

Sa gihimong pagtasa sa NPA Arnulfo Ortiz Regional Operational Command niadtong Hunyo 2000, naestablisar ang tataw nga kadaugan sa tibuok rebolusyonaryong kalihukan sa Tunga-tungang Kabisay-an sukad Hulyo 1999. Padayong midako ang ginsakpan sa Partido, Pulang kasundalohan ug masang organisasyon sa tibuok rehiyon. Milapad ang kalangkoban sa mga prente ug sonang gerilya sa duha ka isla. Midaghan ang mga kontra-pyudal nga pakigbisog sa mag-uuma ug uban pang militanteng kalihukan sa mga linupigan sa kasyudaran ug kabanikanhan. Gumikan sa pagpakuyanap sa tulo ka istruktura sa teoretikal ug mga pulitikanhong pagtuon, milawom ang pagsagop sa teorya ug praktika sa Marxismo-Leninismo-Maoismo sa tibuok rebo-

Taliwala sa nagkadaghang tropa sa kaaway sa rehiyon nahimong nilakanglakang nga nakapadaghan ug nakapakusog ang Pulang kasundalohan sa miaging tulo ka tuig hangtud nga nahimong pabilo ang armadong pakigbisog sa ubang matang sa rebolusyonaryong pagsukol sa katawhan ubos sa hut-onganong pagpangulo sa mamumuo pinaagi sa Partido.

lusionaryong pwersa. Pinaagi sa mga malampusong taktikal nga opensiba sa Pulang kasundalohan nga hugot nga nagsubay sa internasyonal nga balaud sa gubat, 14 ka sakop sa Philippine Army 7th Special Forces, PNP-PMG ug Cafgu ang gisilotan samtang 8 ka *hors d' combat* (kaaway nga wala na'y kapasidad nga mosukol) ang gibuhian. Nakumpiska usab gikan kanila ang 20 ka tag-as nga kalibreng armas ug liboan ka mga bala. Sa laktud, napakyas ang laraw sa pahoy'ng rehimeng US-Estrada nga langkaton ang makatarunganong sukaranan sa armadong rebolusyon. Napakyas usab kini sa laraw nga pugnan ang padayong pag-abante sa armadong rebolusyonaryong kalihukan. Napakita ngadto sa halapad nga masa sa katawhan ang dili malalis nga estratehikong superyoridad sa malanatong gubat sa katawhan isip tubag sa walay-undang nga krisis sa alang-alang kolonyal, alang-alang pyudal nga sistema sa nasud.

Isulong ang Malanatong Gubat sa Katawhan

Ang mga kadaugan sa armadong rebolusyon sa rehiyon nakab-ot sa dihang ubay-ubay nga mga bag-o ug beteranong proletaryong rebolusyonaryo ug rebolusyonaryong aktibista gikan sa kasyudaran ang misaka sa kabanikanhan sugod niadtong 1995 aron tibukpanahong moalagad sa katawhan isip mga Pulang kumander ug manggugubat. Mahinungdanon kini nga bahin sa pagpalig-on sa rebolusyonaryong kusog sa kasamtangang yugto sa estratehikong dependsiba, pagtikang ngadto sa bag-o ug mas abanteng yugto sa gubat sa katawhan, ug pag-angkon og hingpit nga kadaugan sa nasudnong demokratikong rebolusyon.

Mahinungdanon nga balikon ang mga puntong gilatiid sa dokumentong *"Ipataas Pa ang Rebolusyonaryong Kaisog..."*:

"Ang mga kadaugan nga nakab-ot sa taktikal nga opensiba sa Pulang kasundalohan sa rehiyon nahimong inspirasyon sa tanang katawhan nga naglunsad og lainlaing matang sa rebolusyonaryong pagsukol sa gambalay sa kontrapudyal, kontrapasista, ug kontraimperyalistang kalihukan. Ang mga kadaugan sa taktikal nga opensiba nipatataw sa pundamental nga hisgutanan sa krisis sa alang-alang kolonyal ug alang-alang pyudal nga katilingbang Pilipino, ug nagbuksas sa kadunot sa linya sa mga renegadong traydor. Ang mga kadaugan sa taktikal nga opensiba nakapadaghan sa mga higala sa rebolusyon, ug sa signipikanteng (gidaghanon) adunay nadani sa tinago ug dayag nga mga pormasyon sa nagkahiusang prente. Busa, dugang nahalingan ang dili mahilot nga panagbangi sa nagmandong hut-ong. Labaw sa tanan, ang mga taktikal nga opensiba sa Pulang kasundalohan nagduso sa pagdaghan pa sa baseng masa sa kabukiran ug sa kasyudaran ingon man nihikyad sa dalan sa pagtunhay sa Pulang pulitikanhong gahum sa kabukiran. Kini nakab-ot nato tungod kay nagmalampuson kita sa pagpahimutang sa pagkamakatarunganon sa armadong

pakigbisog sa entablado sa pulitika sa rehiyon, ug gani signipikante kitang nakatampo sa nasudnong kalangkuban. Butang kini nga angay natong ipasigarbo apan kinahanglan nga walay luna ang pagkampante ug pagkompyansa."

"Mas dugang moluag ang atong inisyatiba sa gerilyang pakiggubat kun mas molapad pa ang erya ug modaghan pa ang prenteng gerilya sa mga isla nga langkob sa Sentral Bisayas. Dakong bahin pa sa erya ug populasyon sa rehiyon nga wala maabot sa paglihok sa Pulang kasundalohan. Dako ang tinguha sa Komiteng Rehiyunal nga dugangan ang nagtunhay nga mga prenteng gerilya sa rehiyon alang sa mas epektibong pagbatok sa kusgan ug daghang tropa sa kaaway, ug alang sa nilakang-lakang nga pagpakusog ug pagpadaghan sa Pulang kasundalohan."

"Mamatikdan sa niaging ulahing unom ka bulan sa tuig 1999 nga walay edukadong kabatan-onan nga nisaka sa kabukiran ug ni-alagad sa Pulang kasundalohan ug kalihukang mag-uuma. Mas minus usab ang pagsaka sa kabukiran sa han-ay sa kabatan-onan gikan sa kabus nga taga-dakbayan ug gikan sa dayag nga kalihukang mag-uuma kun intandi sa nangagi, ug padayong nihit ang gikan sa hut-ong mamumuo. Nagpadayon ang

rekrutment sa Pulang kasundalohan sa han-ay sa kabatan-onan sa rebolusyonaryong kalihukang mag-uuma. Angay kining matagad tungod kay nagpasabot kini nga adunay lat-ang sa linya sa sumusunod sa liderato sa Partido sa rehiyon. Nagpasabot usab kini nga dili nato makab-ot ang atong

tinguha nga mopadaghan pa sa mga prenteng gerilya aron mahimong tiunay nga rehiyunal ang organisasyon sa Partido ug sa Pulang kasundalohan."

"Sa pagpahinog sa estratehikong dependsiba adunay partikular nga papel ang mga adunay kahanas- ug edukadong kabatan-onan nga mamahimong proletaryong rebolusyonaryo. Kun wala kini nga sangkap sa Pulang kasundalohan ug kalihukang mag-uuma, mahimong maus-os o mabalda ang paglambo sa armadong pakigbisog nga nagbase-sa-kabukiran. Angay kining masagop, ug tul-iron ang mga hinungdan sa pagka-ungot sa pagsaka sa kabukiran gikan sa kasyudaran sa mga edukadong kabatan-onan. Kung apektado man ang rebolusyonaryong kalihukan sa kabatan-onan tungod sa sagunson nga dependsibang aksyon sa Pulang kasundalohan sa niaging tuig (1999) kun diin ubay-ubay ang kadaut nga gidulot sa kaaway, angay sab nga ipataas ang ilang rebolusyonaryong kaisog ug determinasyon, andamon ang ilang kaugalingon sa direktang pagsalmot sa armadong pakigbisog. Hustong hinumduman nga nagmalampuson ang kalihukang teoritikal nga edukasyon sa batakang rebolusyonaryong prinsipyo sa rehiyon isip esensyal nga bahin sa Ikaduhang Bantugang Kalihukang Pagtul-id gumikan sa aktibong pagsalmot sa mga proletaryong rebolusyonaryong mga edukadong kabatan-onan ug mga beteranong kadreng edukado. Isip pagduon sa ▶

Ka Ruel MARVIN MARQUEZ

(Mayo 30, 1975 - Hulyo 2, 2000)

Mabugnaw ug mingaw ang sayong kabuntagon niadtong Hulyo 2, 2000. Padulong nang matapos ang mga kauban sa ilang tigum konsultasyon niadtong adlaw, ug ubay-ubay na unta kanila ang mopadulong sa ilang mga takdang sonang gerilya sa musunod nga mga adlaw aron mopadayon sa buluhatong masa sa han-ay sa mga mag-uuma. Si Ka. Ruel, sama sa ubang mga kauban, mahinangpon nga nagpaabot sa maong mga adlaw. Daghang bag-ong mga erya ang naablihan alang sa pagtukod sa baseng masa sa milabay nga pipila ka mga bulan gumikan sa nagkakusog nga demanda sa han-ay sa masa alang sa armado ug dili-armadong pakig-away isip resulta sa nagkagrabeng pyudal ug alang-alang pyudal nga pagpanglupig sa kabanikanhan.

Mga buto-buto sa armas maoy kalit nga nakabuak sa kahilom niadtong alas 6:45 ang takna sa buntag. Giatake sa 3rd Special Forces Company sa 801st IB-PA ang taktikal nga kampo sa prenteng gerilya sa Bagong Kasundalohan sa Katawhan. ▶



◀ punto, matud pa ni Lenin: “Kung walay rebolusyonaryong teorya walay mahitabong rebolusyonaryong kalihukan.” Apan wala sab kini nagpasabot nga walay signipikanteng papel ang mga dili edukado nga kabatan-onan sa tibook paningkamot sa gubat tungod kay ang gubat sa katawhan usa ka kalihukang masa, ug ang masa sa katawhan maoy tiunay nga bayani sa rebolusyon.”

“Ang padayon ug mapanahon nga pag-ila, pag-punting, pagsalikway, ug pagsaway sa motumaw nga kahuyangan, kakulangan, ug kasaypanan nga nahimong babag sa optimum nga pag-abante labaw’ng gikinahanglan kaysa nangagi, tungod kay, mas nigrabe pa ang kalisud sa katawhan nga giduso sa laing hugna sa pagsawom sa krisis sa katilingbang Pilipino nga alang-alang kolonyal ug alang-alang pyudal. Ang mapanahong pagtul-id maoy paagi aron sustinedong mabutang sa tukmang dalan ang rebolusyon ug kanunay magpabilin ang batakang rebolusyonaryong prinsipyo. Sa ingon malikayan nga mogahi ug molamay ang taya sa kalawasan sa Partido.”

“Ang pag-angkon og kaalam ug kahanas, kaisog ug determinasyon usa ka butang nga angay kat-onon ug kaboton sa mga kadre ug sakop sa Partido nga anaa sa Pulang kasundalohan. Kini gikinahanglan nato dili lang tungod kay gusto (nato kini). Gikinahanglan kini ilabina sa pagkakaran tungod kay mas nigrabe ang tanan-bahin nga krisis sa katilingbang Pilipino. Sa sabakan sa alang-alangkolonyal ug alang-alangpyudal nga Pilipinas sobra na ang kahinog sa panginahanglan sa paglunsad og gubat sa katawhan, ang masa sa katawhan nagsinggit sa panginahanglan sa gubat sa katawhan. Labaw kining nihinog sa dihang gipadayag sa

rehimeng E.U-Estrada nga wala silay agenda sa tiunay nga reporma sa yuta. Ang mga tiunay nga proletaryong rebolusyonaryo kinahanglang motubag sa gisinggit sa bagang duot sa katawhan.”

“Sa kasamtangang kahimtang sa nasud ug sa rehiyon sa Sentral Bisayas, subay sa yugto sa estratehikong depensiba, gikinahanglan nga ipataas ang rebolusyonaryong kaalam ug kaisog sa pagpasulong sa linya sa kuyanap ug sunson nga gerilyang pakiggubat nga nanukad sa nagkalapad ug nagkalawom nga baseng masa.”

Ang walo ka martyr sa Kauswagan -- nga sila si Ka. Masay, Nelia, Lalaine, Karina, Cedie, Ruel, Ernie, ug Balodoy -- determinadong dili moampo atubangan sa kusgan nga pwersa sa mersenaryong tropa sa malupigong hut-ong. Mabayanihon silang mibuhis sa ilang kinabuhi diha sa paningkamot nga makapanalipod sa tibuok han-ay ug makaikyas gikan sa pagliyok sa kaaway. Mibarog sila alang sa dalan ngadto sa hingpit nga kaudaugan sa nasudnon demokratikong rebolusyon. Angayan gayud nga padayong huptan og taas ug ipakayab ang gidala nilang bandila ug momartsa sa dalan nga gimantsahan sa ilang dugo.

***Mabuhi ang walo ka rebolusyonaryong martir sa Brgy. Kauswagan ug ang rebolusyonaryong diwa sa tanang bayani sa rebolusyong Pilipino!
Isulong ang gubat sa katawhan hangtod sa hingpit nga kadaugan!***

National Democratic Front (NDF) - Central Visayas

6 July 2000

Ikatulong semana sa Marso sa dihang nangita si Ka. Ruel sa mga kadre ug Pulang manggugubat aron pagpadangat sa iyang kabubut-on sa hingpit nga pagsalmot sa armadong nataran sa pakigbisog. Miagi siya og proseso sa pagtasa ug pagsusi sa iyang mga kapilian ubos sa nasudnong demo-kratikong pakigbisog. Alang kaniya, miabot na ang panahon nga dawaton, nga ang ligal ug parlamentaryong pakigbisog dunay kinutuban ug mahatagan lamang kini og bili kung huptan isip mahinungdanon apan sekundaryong nataran sa pakigbisog kaduyog sa armadong pakigbisog ngadto sa pagkab-ot sa katilingbanong kagawasan.

Usa kadto ka maayong kalamboan alang sa rebolusyonaryong kalihukan tungod kay ang padayong paglambo sa armadong rebolusyonaryon sa Sentral Bisayas nanginahanglan og mas daghan pang intelektwal aron moalagad sa kasundalohan sa katawhan. Sa kinatibuk-an, ang pagpasulod og mga batan-ong kadre gikinahanglan alang sa pagpadayon sa pagsulong sa nasudnon demokratikong rebolusyon. Si Ka. Ruel kanhing nangulo sa usa ka ligal nga nasudnon-demokratikong kapunongan sa kabatan-onan sa Cebu, apan misalig siya nga dunay igo-igong gidaghanon sa mga lider ug aktibista nga makahupot sa mga katungdanan sa pagpangulo niini. Naglihok si Ka. Ruel ilawom sa ligal nga demokratikong kalihukang masa sulod sa taas-taas nga panahon, ug nakita niya nga angayan nang magpadayon sa pag-alagad sa katawhan subay sa nag-unang nataran sa hut-onganong pakigbisog -- ang armadong rebolusyon sa kabukiran.

Si Ka. Ruel usa ka responsableng anak nga dunay maayong rekord sa tulunghaan. Nakadawat siya og pipila ka mga kadunggan sulod sa iyang pagtungha sa elementarya ug hayskul sa Palompon, Leyte. Sa samang higayon, dako ang iyang pagbati ug pagdapig sa mga kabus ug dinaug-daog. Mao kini ang iyang gihuptan hangtud sa iyang pagtungha sa Southwestern University (SWU). Isip usa ka literary editor sa ilang pamantalaang "Quill" sa SWU ug sakop sa Alliance of Students Working for Education Reforms (ANSWER), nisalmot siya sa mga kampanya alang sa mga katungod ug kaayohan sa kaestudyantehan. Ang nagpabiling komersyalisado, kolonyal ug malupigongsistema sa edukasyon nagtudlo kaniya aron

masabtan nga ang reporma ug pag-usab sa sistema sa tulunghaan dili mahimulag sa nagtunhay nga pagpanglupig ug pagpahimulos sa halapad nga katilingbanong konteksto. Ang usa ka dunot nga sistema sa edukasyon produkto lamang sa himalatyang sistema sa alang-alang kolonyal ug alang-alang pyudal nga pagpanghimulos. Sa ngadto-ngadto, iyang nalantaw nga ang makatarunganon ug malahutayong kausaban sa katawhan makab-ot lamang pinaagi sa katilingbanong rebolusyon.

Si Ka. Ruel usa ka maayong proletaryadong rebolusyonaryo.



Sa iyang pagsalmot sa kalihokan, iyang gigamit ang iyang katakus sa pagsulat alang sa pagpatunhay ug pagpakuyanap sa linya ug programa sa nasudnon-demokratikong kalihukan. Ang iyang pagka-pursigido naumol diha sa iyang pagkamapaubsanong maminaw ug mokat-on sa masang estudyante, mamumuo ug sa alang-alang mamumuo sa mga komunidad sa mga kabus. Ang iyang pagkamadasigon isip tig-organisa ug tig-propaganda napalambo diha sa iyang pagka-maablihon sa pagsaway ug pagsaway-sa-kaugalingon ug sa superyor nga mga ideya nga nakat-onan diha sa katilingbanong praktika sa masa.

Ang iyang papel isip lider estudyante wala nahigot diha sa pagpaduso ug pagpanalipod sa mga katungod ug kaayuhan sa mga estudyante. Milambo siya isip usa sa nag-unang nangulo sa kalihukan sa nagkadaiyang sektor sa Cebu tungod kay walay hunong siyang mipasulong sa rebolusyonaryong baruganan sulod sa gambalay sa ligal nga demokratikong kalihukan, mitampo sa iyang ginagmay ug dinagkong pamaagi alang sa pagpalig-on sa kontra-imperyalista, kontra-pyudal ug kontra-pasista nga kinaiya sa kalihukang protesta. Isip pangulo sa Anakbayan sukad niadtong 1998, mitabang siya sa pagpabarog og balik sa kusganong kalihukan sa mga kabataang estudyante, mamumuo, alang-alang mamumuo ug mag-uuma nga hugot nakighiusa sa kalihukan sa masang anak-sa-buhat. Tin-aw kini niyang gihuptan isip bugtong dalan kun diin ang kabatan-onan makasalmot sa pagkab-ot og tiunay nga nasudnon ug katilingbanong kagawasan. Busa, nalakip siya sa bag-ong agos sa mga batan-ong rebolusyonaryo nga misalikway sa mga panghuna-hunang peti-burges sa "gahum sa estudyante", nagkat-on sa rebolusyonaryong teorya, naghimo og katilingbanong pakisusi, ug misalmot sa mga kongkretong pakigbisog sa masa.


Si Ka. Ruel mihukom nga molakaw paingon sa kabanikanhan sa sayong bahin sa Abril aron mangita og pamaagi nga makasulod sa usa ka kampong gerilya ug magpasakop sa Pulang kasundalohan. Ang mga kauban usab sa Pulang kasundalohan mitasa og maayo sa iyang baruganan ug determinasyon, ug ilang nakita ang iyang tiunay nga pagsalig sa pagsalmot sa gubat sa katawhan. Apan gihatagan gihapon si Ka. Ruel og igong higayon alang sa mas lawom nga pagtimbang-timbang sa iyang desisyon. Niadtong sayong bahin sa Hunyo, si Ka. Ruel o nailang Marvin Marquez ngadto sa daghanang katawhan, mibalik sa kabukiran sa Bohol isip usa na ka Pulang manggugubat.

Si Marvin Marquez wala naghupot og armas niadtong adlaw nga milanog ang binuthanay sa mga armas sa Sitio Diis, Kauswagan, Trinidad. Apan hugot niyang gihuptan ang bantugang diwa sa pag-alagad sa katawhan pinaagi sa dalan sa armadong pakigbisog. Apan mas daghan ang kaaway ug naa sa mas bentaha nga pusisyon. Walo ka mga kauban ang namatay diha sa madugoong pagpang-atake sa kaaway -- lakip na niini si Marvin.

Ang kinabuhi ni Marvin isip usa ka manggugubat alang sa katawhan wala lamang magsugod niadtong Hunyo o Hulyo niining tuiga. Ug sigurado, dili kadto mao ang katapusan. Mabuhi si Marvin! ■

PKP Midayeg sa MILF

*Pamahayag ni Gregorio "Ka Roger" Rosal
Tigpamaba, Partido Komunista sa Pilipinas
Hulyo 12, 2000*



Gidayeg sa Partido Komunista sa Pilipinas ang Moro Islamic Liberation Front (MILF) ug ang mga manggugubat sa Bangsamoro Islamic Armed Forces (BIAF) dili lang sa ilang pagkamalampuson sa pagpreserba sa kaugalingon ug sa sistematikong pagpa-atras sa mga pwersang militar bisan pa man sa hingpit nga opensiba sa reaksyunaryong tropa sa rehimeng US-Estrada, kundili tungod usab sa ilang paglunsad og mga armadong opensiba ug pagpahamtang og dugang kadaut ngadto sa mga tropa sa kaaway.

Walay angay isaulog ang rehimeng US-Estrada sa giingong pagkabawi sa Camp Abubakar niadtong Hulyo 9. Napulo ka porsyento lamang ang nasakop sa reaksyunaryong rehimen sa tibuok erya sa Camp Abubakar. Ang mas dakong bahin sa Camp Abubakar, ug ingon man ang uban pa'ng kampo sa MILF nga "nabawi" sa rehimen, nagpabiling malisud nga maangkon sa AFP. Sa pagkatinuod, bisan giisa ni Estrada ang bandera sa pahoy'ng republika didto sa Camp Abubakar, ang mga manggugubat sa BIAF naglunsad og malampusong ambush didto sa Tarragona, Davao Oriental nga miresulta sa pagkamatay sa upat ka sundalo sa mga kaaway ug upat ka tropa ang nasamdan.

Ang hingpit nga pakiggubat ni Estrada batok sa MILF-BIAF hilabihang kapakyas. Wala lamang kini napakyas sa pagdugmok sa MILF-BIAF; gihaling usab niini ang makigbisogong diwa sa katawhang Moro aron madasigong mopasulong sa ilang rebolusyonaryong pakigbisog alang sa kaugalingnan ug mobatok sa palisiyang "genocide" kon ang pagpuo sa kaliwat sa katawhang Muslim sa rehimeng US-Estrada.

Hingpit nga nalipay ang Partido ug mga rebolusyonaryong pwersa sa gipakitang kusganong determinasyon sa MILF-BIAF nga magpadayon subay sa linya sa rebolusyonaryong armadong pakigbisog. Tukma ang pagsalikway sa MILF-BIAF nga mailad sa pagdawat sa gitanyag sa rehimen nga "pulitikanhong kasabutan" nga dili makatarunganong nagtakda sa MILF-BIAF sa pagsurender ngadto sa reaksyunaryong kagamhanan.

Tukmang nahuptan sa MILF-BIAF ang ilang kawsa pinaagi sa pagpatuman sa estilong-gerilya nga armadong pakig-away batok sa nagmandong rehimen.

Human sa sistematikong pag-atras nila, ang MILF-BIAF pagkakaran anaa sa mas maayong posisyon aron mopahamtang og mas labaw'ng kadaut nga atake batok sa pasistang tropang militar.

Sukad sa temporaryong pag-atras nila gikan sa ilang mga kampo, ang MILF-BIAF wala na mahikap lagi karon sa kaaway, nga nakapapugos sa AFP sa dugang nga pagkatag sa ilang pwersa. Kini maoy naghatag og daghang kahigayonan sa MILF-BIAF sa pag-atake sa tropa sa kaaway gikan sa ilang huyang nga bahin. Pinaagi sa paggamit og mas kusganong pwersang militar batok sa himulag ug gagmay nga mga yunit sa AFP ug uban pang bulnerableng target pangmilitar, mahimo sa MILF-BIAF ang ina-nay nga pagpahuyang sa pwersa sa kaaway ug pagpasulong sa ilang armadong pakigbisog gikan sa usa ka ang-ang ngadto sa mas taas nga ang-ang.

Gumikan sa pagsalikway niining makigkunsabo ug sa malampusong pagpatuman sa temporaryong pag-atras, misaka ang prestihiyo sa MILF diha sa katawhang Moro ug sa internasyunal nga komunidad sa Islam. Ang kabangis sa rehimeng US-Estrada sa pagpatuman sa iyang "genocidal" nga pakiggubat (o gubat nga magpuo sa kaliwat) batok sa katawhang Moro, mipatataw sa katukmaan sa ilang pakigbisog alang sa kaugalingnan.

Gisubli sa PKP ang suporta niini sa pakigbisog sa katawhang Moro batok sa malupigong reaksyunaryong rehimen nga nagbase-sa-Maynila ug sa agalong imperyalista niini. Ang Partido mibarog alang sa labaw'ng panaghi-usa tali sa katawhang Pilipino ug katawhang Moro. Ang nagkalain-laing pangmasang organisasyon mahimong makakuha og inspirasyon gikan sa alyansa tali sa NDF

ug MILF. Mahimong maglunsad sila og kalihukan nga magbutyag sa kalampingasan sa magubatong palisiya sa rehimeng US-Estrada, magtigum og suporta gikan sa internasyunal nga komunidad, ug pinaagi sa nagkalain-laing pamaagi tabangan ang mga manggugubat sa NPA ug BIAF.

Ang pagpa-asdang sa mga armadong taktikal nga opensiba sa Bag-ong Kasundalohan sa Katawhan batok sa mga reaksyunaryong tropa maoy nangunang hinungdan diha sa pagpalig-on sa kahiusahan tali sa katawhang Pilipino ug Moro. Kini maoy pagahimuon sa Pulang kasundalohan sa lain-laing sonang gerilya sa tibuok nasud, ilabina sa mga lugar diin ang mga tropa sa kaaway nahimong nipis tungod sa sobrang pagkonsentra sa pwersa sa AFP batok sa MILF-BIAF, ug bisan sa pipila ka mga erya sa Mindanao batok sa relatibong mas gamay ug himulag nga tropa sa kaaway. Dugang pa, ang NPA ug BIAF makalunsad og lain-laing porma sa pangmilitar nga tinabangay lakip na ang pag-inambitay sa kasayuran kalabot sa disposisyon sa kaaway, binayloay sa mga kasinatian, pagbansay, ug sa pipila ka higayon, pagkoordinar og mga taktikal nga opensiba batok sa kaaway.

Kahugnuon na ang rehimeng US-Estrada tungod sa kadako nga gasto niini sa gubat. Ang pondo niini alang sa gubat nagkagamay samtang padayong nagkagrabang ekonomikanhong krisis sa Pilipinas isip resulta sa pagpaduso sa pahoy'ng rehimen sa pagpatuman sa mga palisya-dikta sa agalong imperyalista niini. Sa pikas bahin, ang mga rebolusyonaryong pwersa sa MILF ug sa NDF padayong nagkakusog tungod sa pagkamakatarunganon nga paglunsad sa rebolusyonaryong armadong pakigbisog batok sa dili makatarunganon ug malupigong rehimen. Ang suporta sa katawhang Pilipino ug Moro alang sa NDF ug MILF walay katapusan ug ang ilang determinasyon walay kinutuban. Ang kasaysayan magpamatuod nga sila ang molutaw nga madaugon sa mga gubat nga ilang gilunsad.

(Sgd.) Gregorio "Ka. Roger" Rosal

Hulyo - Agosto 2000 /PAKIGBISOG